



Swyddfa Cyllid Ewropeaidd Cymru

Ymadael â'r UE: Y Cyfnod Pontio a'r Cyfnod Ar Ôl Pontio - Rhaglenni Cronfeydd Strwythurol yr UE 2014-20 Cwestiynau Cyffredin

Fersiwn 4
Chwefror 2022



HANES FERSIYNAU

Fersiwn	Dyddiad	Sylwadau
1.0	8 Rhagfyr 2020	Anfonwyd yn uniongyrchol at ymgeiswyr ERDF/ESF. Cyhoeddwyd ar dudalennau Cyllid yr UE ar wefan Llywodraeth Cymru.
2.0	Chwefror 2021	Diweddaru Cwestiynau: 6, 7, 8, 9 a 10.
3.0	Medi 2021	Diweddaru Cwestiyn: 8
4.0	Chwefror 2022	Diweddaru Cwestiyn: 8

Cefndir

Nod y ddogfen hon yw rhoi rhagor o fanylion i fuddiolwyr gweithrediadau'r Cronfeydd Strwythurol ar sut y gallai'r cyfnod pontio a'r cyfnod ar ôl pontio Ymadael â'r UE effeithio'n uniongyrchol ar redeg gweithrediadau sy'n bodoli eisoes. Fodd bynnag, mae'n bwysig nodi, ar gyfer y rhan fwyaf o weithrediadau a ariennir gan yr UE, mai ychydig iawn o newid a fydd ar ôl diwedd y cyfnod pontio ar 31 Rhagfyr 2020.

O dan delerau'r Cytundeb Ymadael, y cytunwyd arno rhwng y DU a'r UE ddiwedd

2019, bydd y DU yn parhau i gymryd rhan yn rhaglenni'r UE a ariennir drwy Fframwaith Ariannol Amlflwydd presennol 2014-2020. Mae hyn yn cynnwys yr holl Gronfeydd Strwythurol a Buddsoddi Ewropeaidd (ESIFs):

- Cronfa Datblygu Rhanbarthol Ewrop (ERDF)
- Cronfa Gymdeithasol Ewrop (ESF)
- Rhaglenni Cydweithredu Tiriogaethol Ewropeaidd (ETC)
- Rhaglen Iwerddon Cymru
- Cronfa Amaethyddol Ewrop ar gyfer Datblygu Gwledig (EAFRD)
- Cronfa'r Môr a Physgodfeydd Ewrop (EMFF).

Mae hyn yn golygu nad oes unrhyw newid yn y trefniadau presennol ar gyfer buddiolwyr prosiectau cyfredol a ariennir gan yr UE. Mae hyn yn berthnasol i bob agwedd ar reoli prosiectau gan gynnwys cyflwyno a thalu hawliadau, gwiriadau dilysu ac, yn bwysig, cadw cofnodion perthnasol.

Mae rhagor o wybodaeth ar gael drwy ddilyn y ddolen a ganlyn (gwefan Llywodraeth Cymru):

[Brexit a phrosiectau a ariennir gan yr UE](#)

Yn y cyfamser, mae'r ddogfen Cwestiynau Cyffredin hon wedi'i llunio i fuddiolwyr gyfeirio ati cyn cysylltu â WEFO. Mae'r ddogfen hon yn mynd law yn llaw â'r ddogfen **'Rheolau Cymhwystra ac Amodau ar gyfer cael Cymorth o'r Cronfeydd Strwythurol Ewropeaidd 2014-2020'** ac yn rhan o reolau cenedlaethol Cymru ar gyfer y Cronfeydd Strwythurol.

1. Beth yw'r cyfnod pontio a phryd y daw i ben?

Fel rhan o'r Cytundeb Ymadael y cytunwyd arno rhwng y DU a'r UE ddiwedd 2019, gadawodd y DU yr Undeb Ewropeaidd yn ffurfiol ar 31 Ionawr 2020 ac

ymrwymodd i'r hyn a elwir yn 'Gyfnod Pontio' (a elwir weithiau'n gyfnod gweithredu) tra bod y DU a'r UE yn negodi'r berthynas yn y dyfodol. O dan delerau'r cyfnod pontio, parhaodd y rhan fwyaf o gyfraith yr UE i fod yn gymwys i'r DU a olygai nad oedd llawer wedi newid o ran perthynas y DU â'r UE. Ar ddiwedd y cyfnod pontio ar 31 Rhagfyr 2020, mae'n debygol y bydd rhai newidiadau a allai effeithio ar rai gweithrediadau presennol a ariennir gan yr UE.

2. A fydd unrhyw beth yn newid o ran cyflawni Rhaglenni'r Cronfeydd Strwythurol ar ôl y cyfnod pontio?

Na, ni fydd unrhyw newid i'r trefniadau presennol ar gyfer y gweithrediadau presennol a ariennir gan yr UE. Fel y cyfeirir ato yn Erthygl 138 o'r Cytundeb Ymadael, bydd pob gweithrediad yn parhau i dderbyn cyllid yr UE o dan y rheolau arferol a dylech barhau i gyflawni eich gweithrediad fel yr ydych chi ar hyn o bryd. O dan delerau'r Cytundeb Ymadael, a lofnodwyd ym mis Ionawr 2020, bydd y DU yn aros yn rhaglenni ESIF 2014-2020 gyda chyllid yr UE tan fis Rhagfyr 2023, pan fyddant yn cau.

Nid oes angen unrhyw newidiadau i'ch Cytundeb Ariannu presennol a bydd yr holl rwymedigaethau sy'n deillio o'r Cytundebau Ariannu hynny yn parhau i fod mewn grym.

3. A fydd gweithrediadau'n parhau i gael eu hariannu ar ôl y cyfnod pontio?

Bydd, bydd buddiolwyr yn parhau i dderbyn cyllid gan yr UE dros oes y gweithrediadau ac o fewn y dyddiadau y cytunwyd arnynt yn eich proffil cyflawni. Bydd angen trafod unrhyw newidiadau i'r dyddiadau hyn a chytuno arnynt gyda'r Swyddog Datblygu Prosiect WEF0 a neilltuwyd ar eich cyfer. Er mwyn galluogi/cynorthwyo gyda chau rhaglenni 2014-20 yn drefnus, bydd y rhan fwyaf o'r gweithrediadau a gefnogir gan WEF0 yn gorffen erbyn mis Mehefin 2023. Fodd bynnag, mae rhai eithriadau, ond bach iawn yw'r rhain. Dylech barhau i ddefnyddio WEF0 Ar-lein i gyflwyno hawliadau a diweddarau gwybodaeth.

4. A fydd y rheolau a'r amodau presennol yn parhau ar ôl y cyfnod pontio?

Bydd, bydd yr holl reolau ac amodau presennol yn parhau i fod yn gymwys ar ôl y cyfnod pontio ac mae hynny'n un o ofynion y Cytundeb Ymadael rhwng yr UE a'r DU. Mae hyn yn cynnwys y rheoliadau ESI eu hunain, caffael, cymorth gwladwriaethol a GDPR. Dylech barhau i gyfeirio at yr un rheolau cymhwysedd a dogfennau canllaw WEF0 a dilyn holl gyfraith berthnasol yr UE.

5. Gweithrediadau sy'n cael eu datblygu ar hyn o bryd

Os ydych yn gweithio ar weithrediadau posibl, dylech barhau i ddatblygu eich cynlluniau gyda ni.

6. A fydd y Rheoliad Cyffredinol ar Ddiogelu Data (GDPR) yn dal i fod yn gymwys ar ôl y cyfnod pontio?

Yn ystod y cyfnod pontio roedd y GDPR yn parhau i fod yn berthnasol i'r DU ac roedd yn ofynnol i barhau i ddilyn y gyfraith a'r canllawiau a fodolai eisoes. O 1 Ionawr 2021 ymlaen, mae'r GDPR wedi dod yn rhan o gyfraith y DU (gyda mân ddiwygiadau i wneud iddo weithredu'n iawn mewn cyd-destun y DU yn unig) ac mae'n cael ei alw yn awr yn 'GDPR y DU'. Bydd Deddf Diogelu Data 2018 yn parhau i fod yn gymwys. Mae Llywodraeth y DU wedi dweud na fydd cyfyngiadau ar drosglwyddo data o'r DU i'r Ardal Economaidd Ewropeaidd (AEE). Mae hyn yn golygu y bydd cyfraith a safonau diogelu data yn parhau, i raddau helaeth fel ag o'r blaen, ac ni fydd hyn yn effeithio ar lif y data yn y DU ac o'r DU i'r UE. **Felly, ni fydd y rhan fwyaf o weithrediadau'n cael eu heffeithio ar ôl y cyfnod pontio.** Gweler yr ymateb isod am ddata a drosglwyddir o'r tu allan i'r DU.

7. Beth am gyfyngiadau ar drosglwyddo data o'r UE/AEE i'r DU?

O 1 Ionawr 2021 ymlaen, mae'r DU yn cael ei hystyried fel trydedd wlad, hy gwlad sydd y tu allan i'r UE/ AEE ac felly sydd y tu allan i Ddeddfwriaeth GDP yr UE. O ganlyniad, mae trosglwyddo unrhyw ddata o'r UE/ AEE i'r DU yn ddarostyngedig i gyfyngiadau GDPR y DU ar drosglwyddo data personol i drydydd gwledydd. Er mwyn galluogi parhad y llif rhydd o ddata personol o'r UE/ AEE i'r DU, mae'r Comisiwn Ewropeaidd a'r DU yn cyd-drafod i ddatblygu penderfyniad digonolrwydd.

Wrth aros i benderfyniad digonolrwydd gael ei wneud/ ei gyhoeddi, mae Llywodraeth y DU a'r UE wedi cytuno y caniateir i ddata personol o'r UE (a'r AEE) i'r DU lifo'n rhydd am gyfnod nad yw'n hwy na chwe mis, hy tan ddiwedd mis Mehefin 2021. Bydd y cyfnod amser hwn yn galluogi'r UE a'r DU i ddatblygu'r penderfyniadau digonolrwydd gofynnol. Rhaid i fuddiolwyr barhau felly i ddilyn (a) cyfraith diogelu data yr UE (fel ag yr oedd ar 31 Rhagfyr 2020) a'r (b) gweithdrefnau/ prosesau sydd ar waith ar hyn o bryd ar gyfer adrodd ar ddata o'r fath/ eu darparu i WEFO.

Er gwybodaeth, mae dolenni i'w cael isod i'r adrannau perthnasol ar wefan Swyddfa'r Comisiynydd Gwybodaeth sy'n (a) cyhoeddi'r estyniad chwe mis ar gyfer llif data a (b) darparu manylion ynghylch cod ymarfer ar rannu data Swyddfa'r Comisiynydd Gwybodaeth – canllaw ymarferol yw hwn ar gyfer sefydliadau ar sut i fynd ati i rannu data personol gan gydymffurfio â'r gyfraith diogelu data:

Datganiad Swyddfa'r Comisiynydd Gwybodaeth mewn ymateb i gyhoeddiad Llywodraeth y DU ynglŷn â'r cyfnod estynedig ar gyfer llifau data personol, a fydd yn caniatáu amser i gwblhau'r broses digonolrwydd: <https://ico.org.uk/about-the-ico/newsand-events/news-and-blogs/2020/12/ico-statement-in-response-to-uk-governments-announcement-on-the-extended-period-for-personaldataflows-that-will-allow-time-to-complete-the-adequacy-process/>

Rhannu Data, Swyddfa'r Comisiynydd Gwybodaeth: cod ymarfer:

<https://ico.org.uk/for-organisations/data-sharing-a-code-of-practice/>

Bydd hyn yn effeithio'n bennaf ar weithrediadau yn rhaglen Iwerddon Cymru. Mae WEFO wedi rhoi gwybod i fuddiolwyr y gweithrediadau hyn ac, os bydd angen,

bydd yn sicrhau bod mesurau diogelu priodol yn cael eu sefydlu i sicrhau y gall data barhau i lifo.

8. Beth fydd yn digwydd i'r rheolau caffael cyhoeddus ar ôl y cyfnod pontio?

Rhaid i reolau caffael cyhoeddus barhau i fod yn gymwys i bob gweithrediad a ariennir gan yr UE ar ôl 31 Rhagfyr 2020. Felly, er mwyn gallu bodloni'r gofynion cysylltiedig, rhaid i fuddiolwyr barhau i hysbysebu contractau sydd y tu hwnt i drothwyon penodedig a chyhoeddi hysbysiadau yng Nghyfnodolyn Swyddogol yr Undeb Ewropeaidd (OJEU) a Tenders Electronic Daily (TED). Mae'r Comisiwn Ewropeaidd wedi cadarnhau y bydd y DU yn parhau i gael mynediad at OJEU a TED hyd nes y daw'r Rhaglenni i ben. Rhaid i fuddiolwyr felly barhau i hysbysebu'r contractau hyn/ cyhoeddi hysbysiadau dyfarnu contract drwy GwerthwchiGymru ac, er mwyn sicrhau bod yr hyn a gaiff ei gaffael yn cael ei hysbysebu yn OJEU a TED, bydd angen i fuddiolwyr **roi tic yn y blwch 'ariennir gan yr UE'** wrth lenwi'r ffurflen creu hysbysiad contract ar system GwerthwchiGymru.

Diweddariad Ionawr 2022: O 1 Ionawr 2022 bydd rhaid i unrhyw caffael a ariennir gan yr UE gydymffurfio â **trothwyon newydd y DU** fel ei gosodir yn:

Procurement Policy Note 10/21 – Thresholds and Inclusion of VAT - GOV.UK (<https://www.gov.uk/government/publications/procurement-policy-note-0921-thresholds-and-inclusion-of-vat>)

Mae hyn yn golygu, yn ogystal â chydymffurfio a'r trothwyon diwygiedig, bydd rhaid i awdurdodau contractio bellach yn gynnwys TAW yn eu hamcangyfrifon gwerth cytundeb wrth sefydlu os yw cytundeb yn cyrraedd y trothwyon. Mae hyn oherwydd fod y DU nawr yn aelod annibynnol o'r Cytundeb Caffael Llywodraethol (Government Procurement Agreement – GPA) ac yn gosod eu trothwyon eu hunain yn unol a fethodoleg safonol y GPA a fabwysiedir gan aelodau'r GPA sy ddim yn rhan o'r UE. Mae gadael TAW allan o'r gwerthoedd trothwy yn fesur mewnol i'r UE na ddylid ei ddefnyddio yn y DU ar ôl gadael yr UE. Gan nad yw'r DU bellach yn Aelod Wladwriaeth, nid yw'n ofynnol i'r UE gyhoeddi gwerth sterling unrhyw drothwyon newydd. Felly nid yw'n ymarferol bosibl i fuddiolwyr y DU o gronfeydd yr UE gydymffurfio a'r trothwyon a osodir yng nghyfarwyddebau'r UE ac fe ddylid dilyn y trothwyon a amlinellir yn y PPN uchod. Bydd angen i fuddiolwyr, wedi'u lleoli yn Ne Iwerddon ac yn derbyn cymorth gan Raglen Iwerddon Cymru, barhau i gadw at drothwyon/ cyfarwyddebau'r UE wrth ymgymryd â/ cymhwyso polisiau/ prosesau caffael priodol.

Diweddariad Gorffennaf 2021: Mae GwerthwchiGymru wedi cyhoeddi **eitem newyddion (News - Sell2Wales (gov.wales))** sy'n cadarnhau y bydd unrhyw

contractau newydd sy'n cael eu caffael ar gyfer prosiectau a ariennir gan yr UE yn cael eu cyhoeddi yn OJEU, TED a GwerthwchiGymru yn unig o fis Gorffennaf 2021 ymlaen (ni fydd y contractau hyn yn ymddangos yng Ngwasanaeth Canfod Tendr (FTS) y DU). Mae cyngor cyfreithiol wedi cadarnhau bod angen cymryd y cam hwn er mwyn osgoi mynd yn groes i Erthygl 52 o Gyfarwyddeb Caffael Cyhoeddus yr UE 2014/24EU, h.y. rhaid cyhoeddi hysbysiadau contract yn OJEU a TED cyn eu cyhoeddi ar lefel genedlaethol (FTS), oni bai bod 48 awr wedi mynd heibio ers i'r hysbysiad gael ei roi i OJEU a TED. Bydd cyhoeddi yn FTS cyn neu'r un pryd ag yn OJEU a TED yn mynd yn groes i Erthygl 138 o'r Cytundeb Ymadael.

Ar gyfer caffaeliadau gweithredu a ariennir gan yr UE sy'n is na'r trothwy ac a gaiff eu hysbysebu/dyfarnu gan awdurdodau contractio a rhai nad ydynt yn contractio o 1 Ionawr 2021 ymlaen. Bydd dal angen i fuddiolwyr lynu at egwyddorion Cytuniad yr UE o dryloywder, peidio â gwahaniaethu a thriniaeth gyfartal yn ogystal â glynu at eu polisiau caffael sefydledig eu hunain a safonau gofynnol WEFO (fel y nodwyd yn Adran 36 o 'Reolau Cymhwysra ac Amodau ar gyfer cael Cymorth o'r Cronfeydd Strwythurol Ewropeaidd 2014-2020'). Os caiff unrhyw rai o'r rhain eu torri gallai WEFO gymhwyso cywiriad ariannol fel yr amlinellir ym Mhenderfyniad y Comisiwn ar 19.12.2013, o dan y teitl 'Guidelines for determining financial corrections to be made by the Commission to expenditure financed by the Union under shared management, for non-compliance with the rules on public procurement'.

Er gwybodaeth – mae manylion y polisi caffael cyhoeddus i'w gweld ar [wefan GwerthwchiGymru](#) (dolen allanol).

9. A fydd rheolau Cymorth Gwladwriaethol yn parhau i fod yn berthnasol i'm gweithrediad ar ôl y cyfnod pontio?

Fel y nodir yn y Cytundeb Ymadael, mae ein cyfranogiad parhaus yn Rhaglenni Cronfeydd Strwythurol yr UE yn ddibynnol ar barhau i lynu wrth Gyfraith berthnasol yr UE, mae hyn yn cynnwys rheolau Cymorth Gwladwriaethol. Felly, bydd rheolau Cymorth Gwladwriaethol yr UE yn parhau i fod yn berthnasol i'n Rhaglenni ar ôl diwedd y cyfnod pontio. Fel y cyfryw, dylech barhau i gydymffurfio â'r Rheolau Cymorth Gwladwriaethol presennol drwy gydol eich gweithrediadau a hyd nes iddynt gau.

Ni fydd Cyfundrefn Rheoli Cymorthdaliadau'r DU a ddaeth yn weithredol ar 1 Ionawr 2021 yn cael unrhyw effaith ar raglenni a ariennir gan yr UE/ rheolau'r UE. Felly, rhaid parhau i gymhwyso rheolau cymorth gwladwriaethol yr UE, gan gynnwys cymorth de minimis, i Raglenni'r UE.

Ar gyfer gweithrediadau sydd eisoes wedi'u cymeradwyo ac sy'n derbyn cymorth gwladwriaethol (gan gynnwys cynlluniau cymorth gwladwriaethol a oedd i fod i ddod i ben yn wreiddiol ar ddiwedd 2020), mae'r rheolau a'r ddarpariaeth cymorth gwladwriaethol perthnasol yn parhau i fod yn gymwys wrth gyflawni'r gweithrediad yn ei gyfanrwydd. Dylid nodi bod y rhan fwyaf o'r cynlluniau hyn yn awr wedi cael eu hystyried tan 31 Rhagfyr 2023.

Bydd pob gweithrediad a gymeradwywyd o 1 Ionawr 2021 y mae angen cymorth gwladwriaethol arnynt, gan gynnwys cymorth de minimis, yn cael cytundeb ariannu a fydd yn cyfeirio at y cymorth gwladwriaethol perthnasol, ee cynllun Rheoliad Eithriad Bloc Cyffredinol (GBER) Llywodraeth Cymru, cynlluniau GBER a arweinir gan Addysg Uwch (AU), Addysg Bellach (AB) ac awdurdodau lleol (pan fo cynlluniau o'r fath yn bodoli a/ neu wedi cael eu codi gan Lywodraeth y DU), darpariaeth drwy'r Fenter Fuddsoddi Ymateb i'r Coronafeirws (CRII)/ CRII+ Fframwaith Dros Dro Cymorth Gwladwriaethol, etc. Pan fydd buddiolwyr yn cyflwyno gweithgarwch newydd i weithrediadau sy'n cael cymorth gan gronfa strwythurol a gymeradwywyd yn barod, ac y mae'n ofynnol iddynt gael rhagor o gymorth gwladwriaethol, bydd WEFO unwaith eto yn cyhoeddi cytundeb ariannu newydd sy'n cyfeirio at y cymorth gwladwriaethol perthnasol. O ran amrywiol elfennau'r ddarpariaeth Cymorth Gwladwriaethol, cyfeiriwch at yr wybodaeth ychwanegol sydd i'w gweld isod:

Cynlluniau Cofrestredig GBER Llywodraeth Cymru/ CLILC/ AB ac AU o 1 Ionawr 2021:

Mae Uned Cymorth Gwladwriaethol Llywodraeth Cymru yn y broses o ailgofrestru pob un o gynlluniau GBER Llywodraeth Cymru ac yn cynorthwyo i ymestyn pob cynllun GBER a arweinir gan CLILC/ AB ac AU, gan eu hystyried tan 31 Rhagfyr 2023. Bydd buddiolwyr yn gallu parhau i ddefnyddio'r cynlluniau GBER hyn felly ar gyfer eu gweithrediadau a gymeradwywyd gan WEFO o 1 Ionawr 2021 a bydd angen iddynt sicrhau eu bod yn parhau i gydymffurfio â gofynion pob cynllun GBER – fel yw'r arfer ar hyn o bryd. Yn ogystal â hyn, a phan fo gweithgaredd gweithrediaeth a gymeradwywyd yn ymwneud â darparu cymorth ariannol i dderbynwyr (fel y diffinnir yn Rhan Dau, Teitl XI, Pennod 3, Erthygl 3.1.1.b) o Gytundeb Masnach a Chydweithredu'r DU-UE (TCA), bydd yn ofynnol i fuddiolwyr gwblhau rhestr wirio gan nodi eu bod wedi ystyried egwyddorion Cyfundrefn Rheoli Cymorthdaliadau'r DU. Dylai cwblhau'r rhestr wirio fod o gymorth yn achos unrhyw adolygiadau barnwrol posibl y gallai unigolyn neu gwmni eu ceisio lle hawlir bod gan barti 'fantais annheg' a/ neu ei fod 'yn gweithredu y tu hwnt i'w bŵer neu ei awdurdod cyfreithiol'. Gellir cael copi o'r rhestr wirio drwy'r ddolen isod:

[https://assets.publishing.service.gov.uk/government/uploads/system/uploads/attachment_data/file/948391/Public authorities assessment of how individual subsidies comply with UK-EU Trade and Cooperation Agreement principles .odt](https://assets.publishing.service.gov.uk/government/uploads/system/uploads/attachment_data/file/948391/Public_authorities_assessment_of_how_individual_subsidies_comply_with_UK-EU_Trade_and_Cooperation_Agreement_principles_.odt)

Cynllun Fframwaith Dros Dro Cymorth Gwladwriaethol COVID-19:

Cyhoeddodd y Comisiwn Ewropeaidd Fframwaith Dros Dro ar gyfer mesurau Cymorth Gwladwriaethol ar 19 Mawrth 2020 (gyda diweddariadau wedi hynny ar 3 Ebrill, 8 Mai) i gynnwys yr hyblygrwydd a roddwyd i'r Comisiwn Ewropeaidd drwy Fenter Buddsoddi Ymateb i'r Coronafeirws (CRII) a CRII+ wedi hynny. Mae'r cynllun hwn wedi cael ei ymestyn hyd at Mehefin 2021 ac mae ar gael i weithrediadau a ariennir gan yr UE pan fo'r gweithgarwch yn caniatáu hynny.

Bydd yn ofynnol i fuddiolwyr sy'n defnyddio'r Fframwaith Dros Dro ar gyfer gweithgarwch yn eu gweithrediadau sydd â'r nod o atal/ cynorthwyo mewn perthynas ag effaith economaidd COVID-19 ac sy'n golygu darparu cymorth ariannol i dderbynwyr, gwblhau rhestr wirio gan nodi eu bod wedi ystyried egwyddorion Cyfundrefn Rheoli Cymorthdaliadau'r DU. Dylai cwblhau'r rhestr wirio fod o gymorth yn achos unrhyw adolygiadau barnwrol posibl y gallai unigolyn neu gwmni eu ceisio lle hawllir bod gan barti 'fantais annheg' a/ neu ei fod 'yn gweithredu y tu hwnt i'w bŵer neu ei awdurdod cyfreithiol'. Gellir cael copi o'r rhestr wirio drwy'r ddolen isod:

https://assets.publishing.service.gov.uk/government/uploads/system/uploads/attachment_data/file/948391/Public_authorities_assessment_of_how_individual_subsidies_comply_with_UK-EU_Trade_and_Cooperation_Agreement_principles_.odt **Y Cynllun**

De Minimis:

Bydd rhaid i fuddiolwyr Rhaglenni'r UE barhau i gydymffurfio â'r gofynion blaenorol sy'n gysylltiedig â chymorth de minimis, hy (a) sicrhau nad yw derbynnydd y cymorth yn derbyn cymorth a fydd yn rhagori ar y trothwy De Minimis dros gyfnod o dair blynedd ariannol a (b) darparu i dderbynnydd y cymorth fanylion gwerth y cymorth de minimis a ddyfernir.

At hynny, bydd cyflwyno Cyfundrefn Rheoli Cymorthdaliadau'r DU yn cynnwys cynllun/ trothwy sy'n debyg i gymorth de minimis – gyda'r trothwy yn cael ei gyfrifo mewn arian cyfred rhyngwladol a elwir yn Hawliau Arbennig Tynnu Arian. Yng ngoleuni hyn, bydd angen i fuddiolwyr gwblhau rhestr wirio gan nodi eu bod wedi ystyried egwyddorion cynllun/ trothwy Cyfundrefn Rheoli Cymorthdaliadau'r DU. Dylai cwblhau'r rhestr wirio fod o gymorth yn achos unrhyw adolygiadau barnwrol posibl y gallai unigolyn neu gwmni eu ceisio lle hawllir bod gan barti 'fantais annheg' a/ neu ei fod 'yn gweithredu y tu hwnt i'w bŵer neu ei awdurdod cyfreithiol'. Gellir cael copi o'r rhestr wirio drwy'r ddolen isod:

https://assets.publishing.service.gov.uk/government/uploads/system/uploads/attachment_data/file/948391/Public_authorities_assessment_of_how_individual_subsidies_comply_with_UK-EU_Trade_and_Cooperation_Agreement_principles_.odt

Un ystyriaeth sylfaenol ar gyfer buddiolwyr a derbynwyr cymorth: pan fo'r rheol de minimis yn gymwys drwy weithrediad a gefnogir gan yr UE, os bydd buddiolwr a/ neu dderbynnydd cymorth hefyd yn derbyn cymhorthdal drwy TCA y DU-UE sy'n is na throthwy'r Hawl Arbennig Tynnu Arian, bydd

swm y cymhorthdal hwn yn cyfrif tuag at drothwy de minimis yr UE o €200k dros gyfnod o dair blynedd ariannol.

10. A fydd dinasyddion yr UE yn dal i fod yn gymwys ar gyfer gweithrediadau a ddarperir gan Gronfa Gymdeithasol Ewrop?

Byddai unrhyw un a all ddangos tystiolaeth o'i hawl gyfreithiol i fyw/ gweithio yn y DU yn bodloni'r rheol cymhwysedd sylfaenol ar gyfer cyllid ESF p'un a ydynt yn dod o'r UE neu weddill y byd a bydd hynny'n parhau i fod yn gymwys.

Bydd angen i ddinasyddion yr UE, yr AEE neu'r Swistir, sy'n preswyllo yn y DU erbyn 31 Rhagfyr 2020, wneud cais i'r Cynllun Preswyllo'n Sefydlog i Ddinasyddion yr UE i barhau i fyw yn y DU. Bydd y gofyniad hwn hefyd yn berthnasol os ydych yn gymwys fel aelod o deulu person cymwys o Ogledd Iwerddon – ceir rhagor o fanylion am feini prawf y cymhwyster drwy ddolen y Cynllun Preswyllo'n Sefydlog i Ddinasyddion yr UE a ddarperir isod. Y dyddiad cau ar gyfer hyn **yw 30 Mehefin 2021**.

[Y Cynllun Preswyllo'n Sefydlog i Ddinasyddion yr UE ar wefan GOV.UK](#)

Noder nad yw'r gofyniad hwn, yn y rhan fwyaf o achosion, yn berthnasol i ddinasyddion Iwerddon gan nad yw'n ofynnol iddynt ofyn am ganiatâd i ddod i mewn/ aros yn y DU. Ceir rhai eithriadau a gellir dod o hyd i fanylion y rhain yn Neddf Cydgysylltu Mewnfudo a Nawdd Cymdeithasol (Ymadael â'r UE) 2020, Rhan 1, Adran 2 <https://www.legislation.gov.uk/ukpga/2020/20/enacted>

Ar ôl 1 Ionawr 2021, caiff cyfranogwyr yr UE hefyd ddarparu cadarnhad o'u cynllun/ statws preswyllo'n sefydlog i ddinasyddion yr UE i gadarnhau eu bod yn gymwys i gael cymorth ESF. Bydd hyn ond yn berthnasol i gyfranogwyr yr UE a fydd yn cael eu recriwtio i weithrediadau ESF o 1 Ionawr 2021 ac nid oes angen ymarfer ôl-weithredol ar weithrediadau/ gyfranogwyr presennol/ cymeradwy ESF. Mae'r cyflwyniad isod yn egluro rhai manylion ymarferol ynglŷn â sut y bydd Cynllun Preswyllo'n Sefydlog i Ddinasyddion yr UE yn gweithio ac mae'n cyfeirio at y dystiolaeth y gall fod yn ofynnol i fuddiolwyr ei chasglu i ddangos eu bod yn gymwys i gymryd rhan yn y cynllun:

[Cyflwyniad ar y Cynllun Preswyllo'n Sefydlog i Ddinasyddion yr UE](#)

Mae'r prif bwyntiau fel a ganlyn:

- Bydd ymgeiswyr llwyddiannus yn cael tystiolaeth ddigidol o'u statws drwy wasanaeth ar-lein: gov.uk/view-prove-immigration-status. Ni ddarperir dogfen argraffedig oni bai eich bod o'r tu allan i'r AEE ac nad oes gennych eisoes gerdyn preswyllo biometreg. Gellir olrhain cynnydd ceisiadau ar-lein.

- Bydd statws preswlydd cyn-sefydlog a statws preswlydd sefydlog yn galluogi ymgeisydd llwyddiannus i barhau i fyw, gweithio ac astudio yn y DU ar ôl 30 Mehefin 2021.

11. A fydd cyfnodau cadw dogfennau'r UE yn dal i fod yn berthnasol ar ôl y cyfnod pontio?

Byddant. Bydd yr un gofynion cadw dogfennau yn parhau i fod yn berthnasol ac ni ddylech ddinistrio unrhyw ddogfennau hyd nes y cewch hysbysiad ysgrifenedig gan WEFO i wneud hynny, yn unol â'r cyfeiriadau atynt yn y Cytundeb Ariannu a rheolau cymhwysedd WEFO – **Adran 5.1.4.1 Cyfnodau Cadw Dogfennau a Chadw Cofnodion.**

12. A fydd gwiriadau ac archwiliadau'n parhau fel arfer ar ôl y cyfnod pontio?

Byddant. Bydd yr holl wiriadau ac archwiliadau cyfredol yn parhau fel arfer ar ôl y cyfnod pontio. Mae hyn yn cynnwys Tîm Dilysu Rheoli WEFO, Tîm Archwilio'r Cronfeydd Ewropeaidd, archwilwyr y Comisiwn Ewropeaidd a Llys Archwilwyr Ewrop. Bydd gofyn i chi gynnal yr holl ddogfennau perthnasol o hyd a chydymffurfio â'r holl ofynion archwilio.

13. (Cwestiwn penodol Iwerddon Cymru) A all Buddiolwr Arweiniol yn y DU barhau i ymgymryd â'r holl swyddogaethau a chyfrifoldebau presennol neu a ddylem yn awr geisio dod o hyd i bartner arweiniol o Aelod-wladwriaeth?

Mae'r Cytundeb Ymadael rhwng y DU a'r UE yn golygu y bydd y DU yn parhau i gymryd rhan mewn rhaglenni cyfredol tan y diwedd. Felly dylai sefydliadau'r DU sy'n gweithredu fel buddiolwyr arweiniol mewn gweithrediadau barhau i ymgymryd â'r holl swyddogaethau a chyfrifoldebau fel ar hyn o bryd.

Mae'n bosibl y bydd rhai buddiolwyr, yn enwedig y rheini yn y sector cyhoeddus, wedi derbyn llythyr yn ddiweddar oddi wrth Drysorlys ei Mawrhydi (Annwyl Swyddog Cyfrifyddu) yn ymwneud â 'Rheoli Arian Cyhoeddus', DAO 02/ 21, dyddiedig 15 Ionawr 2021. Mae'r llythyr yn rhoi gwybod, gan fod y DU wedi cwblhau ei chyfnod pontio o'r Undeb Ewropeaidd (UE), o 1 Ionawr 2021 ymlaen felly nid oes angen i gyrff cyhoeddus lynu at bolisiau, fframweithiau a phrosesau yr UE mwyach wrth reoli arian cyhoeddus. Nid yw hyn yn berthnasol i Raglenni Cronfa Strwythurol yr UE yn unol â thelerau'r Cytundeb Ymadael (Erthygl 138). Felly, rhaid i bob buddiolwr sy'n derbyn cymorth gan Gronfeydd Strwythurol yr UE barhau i gydymffurfio â chyfreithiau a gofynion yr UE fel y nodir yn eu cytundebau ariannu ar gyfer eu gweithrediadau ar eu hyd/ yn eu cyfanrwydd a chan gynnwys y cyfnodau gofynnol ar gyfer cadw dogfennau.

Os oes gennych unrhyw ymholiadau pellach, trafodwch nhw gyda'ch Swyddog Datblygu Prosiect yn y lle cyntaf. Caiff y ddogfen hon ei diwygio a'i diweddarw wrth i'r sefyllfa ddatblygu.



Am ragor o wybodaeth:

www.llyw.cymru

[@wefowales](https://twitter.com/wefowales)/[@wefocymru](https://twitter.com/wefocymru)

Desg Ymholiadau 0845 010 3355



UNDAE EWRWRELAIDD
EUROPEAN UNION



Llywodraeth Cymru
Welsh Government

**Cronfeydd yr UE:
Buddsoddi yng Nghymru**

**EU Funds:
Investing in Wales**